

أحمد الصعدي

ورد بلدي

شعر

صدرت الطبعة الأولى في أكتوبر 2018

بطاقة الكتاب

عنوان المؤلف : ورد بلدى
المؤلف : أحمد الصعيدى
التصنيف : أشعار بالعامية المصرية
رقم الإيداع : 2018-19186
الترقيم الدولى : 978-977-6656-95-6
عدد الصفحات : 116 صفحة
رقم الإصدار الداخلى: 273
تاريخ الإصدار الداخلى: أكتوبر 2018 (الطبعة الأولى)

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب
الا بموافقة كتابية وموثقة من الشاعر

دار النيل والفرات للنشر والتوزيع
ثورة مصرية تشرق إبداعا على الوطن العربي
رئيس مجلس الإدارة
ناجى عبد المنعم



رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 - فاكس: 020554372901
alnilwaalfourat alnilwaalfourat@gmail.com
المقر الرئيسى: ج.م.ع محافظة الشرقية - العاشر من رمضان - مجاورة 13 - امام سنتر الـ 13 - عقار 304

الإهداء

من كل بيت فارس

من كل غيط نبوت

هانكون لها حارس

لو كلنا هانموت

أحمد الصعیدی



المشهد الأول " الوجع "

المنظر :

راسك فى سابع سما

جدرك فى سابع ارض

وشك مسامح كما

قطر الندى ع الورد

ريحتك وطن

قلبك سكن

رغم المحن

ضحكتك بالعرض .

اللوحة الأولى :

عارف يا واد يا أحمد
أنا كنت أجمد
من عواميد المعبد
كنت بجر الساقية لوحدي
لما البقرة بتهمد
كنت باخلع فدان القطن
و أطلع ع المقعد
آكل مترد قشطة
و سطرين عيش
و أنزل أولع منقد
أشرب براد شاي
و ست بكاوي معسل
و أفضل طول الليل
أضرب مواويل
لحد ما عيني تعسل
دلوقت إنهد الحيل
العزم قليل
و الكبد مكسل

إمبارح روحت المعهد
قال إيه عايزني أتعهد
أبطل شغل
و أكل السمنة
و شرب معسل
قتلهم منك له
أنا مش هاتغسل
ولا هتشال في المشهد
و ها أخش التربة
على رجليا .

اللوحة الثانية :

و كان لى أب
إذا طلع النهار
ضبه
أخذ منه الضيا
صبه
على الضلام و الأمس
و ركب خيال الشمس
و نده ربه
يا فتاح
يا فتاح
و عمر فاسه سلاح
الشياطين يستخبوا
يا عليم
يا عليم
إهدنا الصراط المستقيم
ديم علينا الستر و الصحة
نفوسنا قبل غموسنا

تصلحها

عيالنا قبل أموالنا

يتربوا

قلوبنا قبل جيوبنا

يتعبوا

بالرضا و البركة

كان لى أب

له درجه

في السما

و ربنا حبه .

اللوحة الثالثة :

و كانت أمى
عليها ميت رحمة
تلم الضلمة
فى المحما
تقّب الشمس
فى وشها وحة
و يستخبى الليل
بشعرها الفحة
صوابها تنخ حليب
و الندى زحة
تقوللى كلام إذا قلته
البدن ببشيب
يجعل فى وشك جوهرة
يجعل فى بقاء سكرة
يجعلى عمرك كيل درة
و ف كل خطوة مرمرة
يا أحمد يابن بطنى .

اللوحة الرابعة :

هما يادوب
حبة قراريط
اسمهم الغيط
رايح جاى
منهم للبيت
بينه و بينهم سر
قراره غويط
بينه و بينهم عمر
و شرح و حوادث
خط و خيط
ضل و حيط
عبا ترابها
غبيط ب غبيط
ربا قصبها
شريط ب شريط
خبا ديابها
و العفاريت
وصية كتبها

بالمحاريت
الموت على بابها
و لا التفريط
بس ياريت
الدنيا بتفضل دنيا
و الخلق ما تبقاش تانية
و تتغير ثانية بثانية
اتلموا ولاده
قالوا وعادوا
كلام و حديث
يابا نبطل نزرعها
و نقطعها
نبيعها مبانى
دلوقت المتر بتاعها
بالشئ الفلانى
ها يجهزنا
و يجوزنا
و يرقينا
و يعزنا
و نسيب الطين

اللى غارزنا
طول العمر
برق بعنيه الحمر
و صوابعه السمر
اسمع يابنى انت و هو
انا لا حول و لا قوة
رجل برة و رجل جوه
والفاضل فيا يادوب
على قد الدود
عمرى ما اقابل معبود
و ورايا عمود خراسانة
على عود القمح
و سياخ سلخانة
للنوار و الطرح
انا ابو الغيط المولود
فى الخط
و هاموت فى الخط
و ياكلنى الدود
و يفضل منى الملح
لليوم الموعود .

اللوحة الخامسة :

عبد الهادي النص بيصحي

أول واحد في المنوفية

يطلع يملا الشارع كحة

و يزق لمراته شوية

قومي يا ولية

الشمس كلتها الوطايط

و ترد زكية

حد يا راجل راح الغيط

لما هانصحي في نص الليل

دول ما كانوش حبة قراريط

هاتورينا عشانها الويل

كل الناس يا ولية زمانهم

خشوا غيطانهم

اللي بيحرت

و اللي بيعزق

مش راقدين على فرن حريمهم

انتي التلفزيون خلاكي

تاكلي فطارك ويا غداكي

طب والله ثلاثة يا شيخة

لو ما رجعتي عالي معاكي

ل أدب التلفزيون دا بفاسي

و أريح راسي

قومي يا ولية و مصبحناشي

تهم زكية تنط الفرن

و تدخل تحلب لبن الصبح

يا سلام لما الواحد منا

يصبح عينه بلبن الصبح

و يمسيها بلبن الليل

مع ترتيل الشيخ ع الباسط

يغسل نفسه اللي اتعاصت

من أي سبيل

المرجوع لمرات النص
لما تخلص تجري تخش
في خص الطير
ماهو مربوط خير
أيها جحر في دار فلاح
مربط خير
و تغني زكية تلم الطير
كركر كركر
مريزا مريزا
تعويذة يا ولاد تعويذة
م العين اللي بتحسد فيكم
م المنوفية لحد الجيزة
هيا عزيزة
أنا عارفها
أي و حياة النبي عارفها
عينها يا خلق تشق بريزة
مع صفارة سته و نص
تجري زكية و ترص

عزال الشاي و الغدا و تبص

في عين عب الهادي

بضحكة تقولله

اللي يصلي على المختار

ربك دايم بيسهلله

يعني هاصلي عليك يا شيخة

هاتي البقرة بلاش تدويخة

أهي بطيخة و طلعت قارعة

اتوكلي على ربك عا

سك نهو

يا حمار حا

ارموا حمولكم ع الرزاق

ماء ماء

معزة عبد الهادي تمأماً

تطلب قوتها من الرزاق

هاء هاء

دوغري حمار النص ينهق

يطلب راخر م الرزاق

واء واء

حتى النونو بطرف عيونه

رامي حموله على الرزاق

ماء

هاء

واء

كله بيطلب م الرزاق

و الرزاق

بابه مفتاح عمره ما ضاق .

المشهد الثانى الشارع

المنظر :

السبت إلى فات شفته

سألته عن ضحكته

كلمنى عن شعرى

طلعت له سيجارة

ورانى رسم القلب

رايح لفين ؟ بص لى

عندما تفوتنى

محتاج فلوس ؟ قام ضحك

معاك؟

تهتت

دخل منى الزحام فجأة

اللوحة الأولى :

الست اللى بتقعد بالنابت

والملوخية الناشفة

جنب شريط القطر

ولية مناكفة

لا برد يروحها

ولا حر يسيحها

ولا تستجرى حكومة

تزرزحها

من مطرحها

عارفة تاريخ

وسياسة

وشعر

وتضرب بالموال

بتبيع بمزاجها

وتسب اللى يفاصل

وتقولك لو راجل بص

انا فرسة

وعايزة الخيال

امشى انجر
هاتلى رغيغ
و بنص حلاوة
وخللى بتاع المقلة
يحط شريط لياسين
وتنزل ذكر
ومرة تزغرط
وساعات بتعيط
ويروح القطر
وييجى عليها
يهدى قصاها
يصفر لها
وتشور له
بصباها الاوسط
يطلع جرى .

اللوحة الثانية :

الواد اللى بيسرح
بالمناديل الساكة
فى موقف مصر
شبين كلها عارفاه
بيودع كل مسافر
و يرحب بالراجعين
من وشك يعرف مشوارك
و يقاسمك فيه
ب كلمة
ب ضحكة
شتمة قبيحة للقوانين
وشه اسود م الشمس
و من دخان العربيات
و قولة مش عايزين
مع ذلك ما تعبش
ولا ضاقت بالضحكة شفايفه

انا لسه امبارح شايفه
بيسرح برضو
ويفرق عالناس احاسيسه
مع انى عمرى ما شوفته
بيبيع منديل .

اللوحة الثالثة :

الست اللى بتتعد
تحت الكوبرى العلوى
تشرب فى سجائر
و تسب الراح و الجاى
و تستنانى الصبح يوماتى
اطلب لها كوباية شاي
م القهوة التجارية
واقعد جارك لحد ماتشرب
تتأمل فيا و تتصعب
و تطبطب على كتفى شوية
و ضهرى شوية
عديت امبارح ما لقيتهاش
- معلىش يا استاذ
- لو نعرف عنوانك
كنا يعتنالك
طب ليه بتموت

مع انها حتى ماحاولتش
تطلع مرة الكوبرى
ولا بصت على وش الصورة
الملزوقة فى صدره
ولا تفهمش فى الانتخابات
ولا تعرف ايه يعنى فلوس
- كنا هانرميها
- ماحدش عايز يشرب فيها
طب ليه ترميه
مانا هاقعد برضو تحت الكوبرى
و اشرب نفس الشاى
واسب الراح و الجاى
بس ماحدش
ها يطبطب
على صدرى .

اللوحة الرابعة :

مع جنزيرك

رجلى بتجرى

تلف العمر

فى بناطيلى الدايبه

قمصانى اللى فاتتها الموضه

على بحر شبين

العالم سايق على اخره

يتسابق عالموت و الحلم

انا و انتى بننهج

بين العربيات الطايحه

و بتارين العرى

بتشتم فينا

- اركن يابا

- خذلك جنب

- اتاخر

- وسع

لسه العجلة النصر دى عايشه ؟

سيبك منهم
عالم وسخة
ما بتفهمش
انى عشانك
ضحيت ب قيراط
م الورث بتاعى
لانىك بس
من ريحة ابويا .

اللوحة الخامسة :

الإسم كان عمى فرج
له عين بتحقد ع الميرندا
و عين بتستنى الفرغ
الصدر قدر العرقسوس
أما الإيدين
فيه واحدة منهم كبايات
و الثانية بترن بصاجات
افرجها يا صاحب الفرغ
مال الزمن منا اتعوج ؟
و إحنا اللي كنا في عزنا
بنضحك حرج
في وشوش زباين
ملتقوش حبة خمير
إحنا اللي وقفنا الوزير
جنب الأجير
إحنا اللي بورنا الكثير

ياما كان يغير
منا العصير
مانجة فراولة
اللمون البنز هير
العرقسوس كان الأمير
ياللا الخمير
ياللا الخمير
الشمس في السما
اتوسطنت
و إتسلطنت
لا قدره مال
ولا كباياته إتعكرت
و اتعثرت منه الخطاوي
و كشرت فيه القهاوي
يا صلاة الضهر داوي
ما عمل فينا النهار
والصلا في زمن الغلا

كما الاضطرار
خلص و دار
لف المزار
و إندار و شال
القدر من جار الجدار
شد الحزام
شق الزحام
بتبيع بكام ؟
أوامر يا بيه
هات لي بجنيه
قصدي بدولار
بتقبل شيك ؟
يفرجها يابني اللي بيديه
رسم الصور
ياللا الخمير
ياللا الخمير

و صرخ صرخة فقير
ليه يا زمن مبقاش ملك ؟
ليه يا زمن مبقاش أمير ؟
هاتقوللي إن الفقر حشمة
و الغنا طوق الغرق
مين اللي قال إن الحرير
جاب العرق
مين اللي قال إن الكثير
ساب القلق
دي مهدئات الفقرايين
و مخدرات المطحونيين
بالظبط زي الفجل
غلب الحمام
و القش أريح م الرخام
حتي اسألوا سيدنا الامام
يا صلاة العصر ناوي
أبقى حاوي

كما كل حاوي في عصرنا

كما كل مصاص دمنا

أو أقولك أحسن ارتضى

ب اللي اتقسم لي

و اهتدي

و ماتضحكيش يادي الميرندا

إن كنتي سلطنة الزمن دا

بكرة تيجي تقعدني

حيرانة زي العرقسوس .

المشهد الثالث الوطن

المنظر :

إوعاك تموت راع
اثبت يا واد دافع
حرمت عليك المراضع
الا من صدر الوطن
منه و اليه راجع
امسك بدمك فى التراب
اركب بحلمك عالضباب
لا عدو همك و لا ارهاب
سرك قديم باتع
انت اللى باقى للوطن
رغم المصاعب و المحن
ما ظهر منها و ما بطن
نجمك اكيد ساطع .

اللوحة الأولى :

لو ترجع ساعة
لو موتك يبقي إشاعة
أدخل أوضتك ألاقي
أفرولك ع الشماعة
تليفونك عمال بيرن
سجايرك و الولاة
لو تطلع م البرواز
تقعد على حجري
تفتح صدري
أضحك و أقولك يا بني
خلاص بطلنا رضاعة
لو أشوفك مادد إيدك
و بتفتح في الشراة
و بتنده إيه يا جماعة ؟
أنا واقف ع الباب
من ساعة .

اللوحة الثانية

و انت طالع خدمتك

افتكر امك

اختك

خالتك

عمتك

جدتك

جارتك

زميلتك

ابنتك

بنات حنتك

الست اللي

لحظة ميلادك

قابلتك

البنات اللي

حببتها

و حبتك

العرض كله

في ذمتك

مخلتاك

سترتك

ايدين

دفعتك .

اللوحة الثالثة :

ما كنتش أعرف
إنك ها تغير إسمك
لبسك
ها تخبى الوحمة
إلى فى وشك
إنك آخر مرة
بتاخذ دشك
بتسرح فى مرايتى
ب مشطاك
ما كنتش حوشتك
و إنت موطى
على إبنك و تصحيه
و ضحكت و بوستك
ما كنتش أعرف
إنك راجع ع الأكتاف
وسط ألاف
بتدور ع العصفور
اللي
بيصاصى فى عشك .

اللوحة الرابعة

العسكرى فرجانى

اما بيطلع خدمة

تقولش الواد ها يحج

بيلم المخلة

و يلمع فى بيادته

يخلق دقنه

يكوى الافرول

و يقول و يعيد

فى حكاية الديب

اللى طلعه

فى اول خدمة سلك

و ازاي ضبه

و جابه الوحدة

ادى تمام

و سلام للقائد

اللى اداله شريطة

و ورقة بمادنة
و اجازة عشر تيام
و انه اما بيطلع عالتبة
كل دياب البر بتعوى
و هو يرد عليها
تطلع تجرى
و انه باقيله خمستاشر صباحية
و يخلص جيش
نادر يطلعهم خدمات
امبارح فات
عالقائد قاله
يافندم
لو ضيبت الديب المرادى
هاخده بلدنا
اربطه فى الغيط
رد القائد قاله
يابو الرجالة

و انا هاديلك حق جاموسة

و برضو شريط

و كمان افرو ل من عندى

علقه فى البيت

طبق كنجى و شنجى

و مع اول خيط

اتلموا دياب البر عليه

عربية ديناميت

انفجرت فيه

و انفجر فيها

بس ما حدش منهم

عدا السلك .

اللوحة الخامسة

و ف كل عام
ينقام الصوان فدادين
للطبالين
و الرقاصين
و عواهر الوطنية
و جنرالات الخطب
و الرتب
و الستر محنية م النياشين
و بياعين الوطن
و العفن
و سواقط الثورية
و صينية من عضمك
دايرة ب كاسات دمك
فى كل عام تتملى
فى صحة غوازي الشعب
حبلوا القسايد فى الحرام
و اللحن بيحل الحزام
للى نطوا ع المقام

دبحوا الحسين كمان مرة

مرة الشفايف

و الكلام مزنوق

صرة الحلوق

المدد و القبيح

طلبوا من أمك التصريح

علشان تقرأ لك الفاتحة

عودا

و ف كل عام

يا شوف عيني

ألم الباقي من نظري

و م العافية

و أجيلك من الصعيد

للقنطرة حافية

أزغرد في المعدية

و أقول ديا

إلى إبنى حررها

و طهرها

و دفع عمره
لها هدية
و أشيل م الميا
بايديا
أصب
أصب
على راسي
أبرد نارى
و أنفاسى
و إحساسى
و أقول يا أرض
تنباسى
و تنداسى
و تستاهلى ميت ركعة
و أروح رابعة
و بير العبد
و الحسنه

لآخر نقطة من دمك
أطلع من دفا صدرى
جواباتك
مفاتيحك
و كارنيهك
و ألم الباقي من عضمك
و أصلى عليه
و أقول يا ننى عين أمك
يا كبدي عليك
ها بينوا قال
هنا عزبة سياحية
لجل الصهاينة الأمريكان
و إالى خان
و إالى تاجروا بالاديان
و إالى فروا لك الولية
أقولك إيه يا واد بطنى
و أنا الباقي ف عيونى بياض
و عضمى أنقاض

و جتتى دايبه
و عافيتى سايبه
و كلى أمراض
أنا لا بيدى ولا بيا
غير دعوة عاجزة محنية
أجلك كل عام حافية
أزغرد فى المعديه
و أقول ديا
إلى ابنى حررها
و طهرها
و دفع عمره
لها هدية .



المشهد الرابع الذكريات

المنظر :

من كام الف عام
وانتى بتبدرى الاحلام
وبتفرشى فى النور
بترنمى
و تكبرى
بتعلمى
و تنورى
ومن يقصدك مجبور
يا كريمة لن تضام
من كام الف عام
وانتى بتقسمى الايام
شهور
والسنين
دهور

والكلام

سطور

والشعور انغام

من كام الف عام

وانتى للسما

بالصلا الفة

و ربنا عارفة

و شايقة

كام الف عام قدام

من كام الف عام

وانتى بتحسبى

للشمس خطوتها

والقمر فى ايدها

طبق بنور

وانتى يابدر البدور

بيتها و طلعتها

و بتديكى التمام

من كام الف عام
وانتى بترسمى البهجة
والضحكة والحواديت
وتفسرى اللهجة
للجن و العفاريت
و تعدى بالواحدة
النجوم يا سلام
من كام الف عام
كنتى
من كام الف عام
وانتى
المجد و الذكرى
الكلمة و الفكرة
بتقدمى ل بكرة
الوحى و الالهام
من كام الف عام
يا مصر حمالة
و كعبة للايتام .

اللوحة الأولى :

من صغر سني
كانت تقوللي
لو صليت الجمعة يا ولدي
أنا ها أدعيلك تصبح أفندي
ولا عمرك ها تقول الآه
بس يا شاطر لما تصلي
تيجي تقوللي
سيدنا الشيخ
قال إيه ع المنبر
كنت أتشمر
و أول واحد أخش الجامع
أقعد دو غري قصاد المنبر
و أفضل سامع شيخ الجامع
لما يبشر
و أما يحذر
و أما يقول يا عباد الله

يا أحباب رسول الله
من أغناه الله يخشاه
و يزكي عن ماله بصدقة
لفقير يكرمه الله
دو غري عنيا تاخدني يمين
ألاقي الحج عطية حسين
راجل يملك نص بلدنا
من بهايمةها و م الفدادين
برضو عنيا تاخدني شمال
ألاقي شحاته أبو ذكري فوا علي
يوم بالأجرة و يوم بطل
فاتوا سنين على نفس الحال
رجلي تاخدني لنفس الجامع
ألاقي الشيخ هواه عمال
لسه بيوعظ خلق الله
يا أحباب رسول الله
من أغناه الله يخشاه

بس لقيت الحج حسين
قرب يملك كل بلدنا
شفت شحاته أبو ذكري كمان
بعد يومين ها يكون عريان
و آخر مرة كنت بصلي
نص الجامع كان نعسان .

اللوحة الثانية :

بـ حمارى البوص

كنت بلفك حافى

و ساعات بلبوص

انتشعبط فى الاسعاف

عربيات الرش

الحنطور

اخطف م الاولاد

اللعب الطين اكسرها

واموت م الضحك

تضربنى الشمس اتكعبل

تلسعنى

اضرب فى الترة بلنصات

اقلد صوت القطر

المصنع

اجرى لحد ما انام

على عتب الجامع

كوم التبن

تصحيني

تاخذني

و ترقيني

تغيرلي هدمي

تعوصلي اللقمة غموس

تعمللي حمار م البوص

ارجع اعفرت طوب الارض .

اللوحة الثالثة :

وكان كلام ستي

ولا الدستور

تقول دكتور

اقول اشطر

تقول مأمور

اقول اخطر

تقوللى يا جن

يا مصور

يا واد يا اصفر

فز انجر عالدودة

اشكى لابويا

يضربنى

اروح لامى

تطبطبلى

اقول هاهرب

يعاندونى

اقول هاطفش
يزقونى
فى مرة ضحكت
عالت اختى وهربنا
تصن تصن وتقوللى
هاقول ل امك
احايلها ما ترضاشى
اهدها ما تتهددش
اجيبلك ايه يا بت ال
فقالتلى بلح
سيدنا الغيطانى احمر
طلعت النخلة للشوشة
و يادوب بقطع سباطة وابص
لقيت تحتيا ميت راجل
ب ميت شومة
انزل يا ابن ال -- من عندك
بلح سيدنا الغيطانى

دا بس للخلفا
واهل الطريقة و الدراويش
و انا خايف
من الخضة مانيش شايف
مانيش عارف
وقعت و اااه
انكسر كتفى
كبروا و قالوا مدد
سر الغيطانى ظهر
نظرة يابو المجازيب
و انا من ساعتها
بروح عالنخلة
اطلعها
واقطعها
واقرا الفاتحة
لسيدنا الغيطانى
و ستى مبروكة .

اللوحة الرابعة :

ليلاتى تحل ضفايرها

تسن فى رمشها السلة

تعيد عالكحلة تتحنى

تقرب صدرها ميزانة

تقلدى سعاد حسنى

تجيب عالعشا صابع

و رمانة

تزيد تحويجة القهوة

أستهوى

أفك حزامى على سهوة

أزيد الشهوة فى الجوزة بتلجاية

فيتقايا النفس صدرى

أزعق للعيال مرة تنام بدرى

أقوم أبذل

أدوخ أنزل

تقوللى صفر من عشرة

أقول بشرى

للمجتهد أجرين .

اللوحة الخامسة :

كانت لما بتطلع تنشر

و أنا واقف عالسطح بذاكر

و بعيد الثانوية لرايع مرة

تلبس جليبتها المبلولة على العرى

تلم فى ديلها و تعصر فيه

تنشر عالجل القمصان

السنتيانات

يحرن منى كتاب الكيميا

تعالى اكتب لى جواب للحاج

ماشى

أمى تكح فى وسط الدار

ذاكر يا أحمد

تغطس وسط القش و تضحك

تطلع

تنزل

تعصر

تنشر

تهرب منى الفيزيا

الاحصا

الرياضيات

أسيب الثانوى و أخش صنايع .

المشهد الخامس الغربية

المنظر :

المشهد واقع جدا
و إيقاعه بيهرب منك
مع إنك حافظ دورك
و حاضر كل البروفات
طول عمرك مستنى الفرصة
و بتحلم بالنجومية
أهى قادت كل الأنوار
و القاعة كومبليت
مش معنى إنك طول العرض
موجود عالخشبة
إنك بطل العرض
و الضلمة أوسع للخيال جدا
الحدوة بجد ممة
و الأدوار بتخش فى بعض

و الإضاءة مزعجة
إزاي هاتنزل بالنهاية
المكياج ببسبح على وشك
و ملامحك بتضيع وياه
دلوقت ممكن تنزل
بالديالوج الماستر
إنزل وسط الجمهور
سقف بحرارة
و إقعد فى آخر كرسى .

اللوحة الأولى :

جايز بيموت دلوقت

أو مات

فى طريق بغداد البصرة

على شط الفرات

جايز بيموت فى سامرا

الموصل

أربيل

فى (الشاى خانة) إالى قعدنا عليها

شربنا القهوة بـ (هيل)

على صدر أم فراس بالكاظم

لازم ميت بالاهوار

بالأغوار

فى قصيدة لبدر السياب

أو أغنية لناظم

جايز متحاصر

متطوق

مأسور
بيعد الجرحى
القتلى
الأسرى
مستنى الدور
مجروح
مدبوح
مش لاقى مكان
لطلوع الروح
لـ نفسه تمر
لـ سره يبوح
و أنا فى الأوضة الضلمة بجاهد
بالشعارات
أكتب و أكذب
أشتم و أشجب
أشطب إسمى م الجوابات
جائز مات
أو بيموت دلوقت

مع إن الوقت
ما يحميش الأموات
منا برضك مت
من يوم ما هربت
و سبت أصحابي في بغداد .

اللوحة الثانية :
مولاتي بغداد الأميرة
وقعت أسيرة
سلموها النخاسين
و الخناث و القوادين
يا تاريخ ما تجبشي سيرة
ان مولاتي
ليلاتي
في حضن كلب
بيعاقبها
و يغتصبها

على ننى عين الشعب
و العرب
إخوة و نسب
وسعوا له
و صقفوا له
م المحيط حتى الجزيرة
يا تاريخ متجبشى سيرة
استر على شرف الحضارة
سليلة الرافدين
وجهة إبراهيم و سارة
مرقد الحسانين
السيدة
الماجدة
بوابة الشمس المنيرة
يا تاريخ متجبشى سيرة
ان مولاتى أسيرة

اللوحة الثالثة :

الحق يا رب
أمريكا بتقدم لك ساعتك
ها تخلص عالدينيا بتاعتك
شالت سورك م الميادين
بتسب الدين
و تخلي الناس يقولها آمين
و بتحكم عالكون من بعدك
الحق يا رب
أمريكا
قعدت لك فى القبله
و سحبت الاختصاصات
و السلطات
مفاتيح النار و الجنة
دفاتر الحسابات
الحق يا رب
أمريكا
بلا دين .. بلا قلب

محاصرة بيوتك

شرق و غرب

صلواتك

فى مهانة و كرب

سمواتك

حصلها الضرب

طب إمتى هاتجمع قوائك

و تخش الحرب

إمتى يا رب ؟

اللوحة الرابعة :

الروح مسافرة كربلا حافية و متاكلة
حجر ابن بنت النبی بیستقبل القتلى
و يلم فى المجاريح
يا سيدة زينب خدى على فى عبك
و ادى لمحباك و محسوبك أوام تصريح
و أماره أخش النجف الأشرف مع الأسرى
يابو الحسن لمنى
ضمنى
طوحنى عالبرة
قابلىنى يا رابعة
هزى لى من نخلها و من قلبك الجمار
قلبى بيلبص عطش فى أبريقك الفخار
الناى دا ولا الوجع أم رعدة السموات
متشعبة فى البدن يالروح ولا السنار
دا انا اللى رحت دهورك عند الخليل صايم
قاللى النبی یونس فى نینوى مجروح
فین أن تروح یا جدع فى الشهدا تتكعبل
هجموا المغول و التتر و الفرس و الكاوبوى

يا مين يلم الوطن من سكة البيادات
متستفة و مقرفة يا صفحة الخونة
رقدوا على بطنهم عدى العدو آلافات

يا عم يا كاظم

يا فضل

يا عباس

يا كل آل البيت فى السبع عتبات

تلتين بلاد العرب عملا و يهود و مارينز

بيطفشوا الأنبيا و يحضنوا الشياطين

يا نيل أخوك الفرات سقط استعداد

القدس

بغداد

القاهرة

خد عد

يا رايعين الشام خدوا م الجزائر شاش

و بلغوا فى اليمن و فى السودان نوبة

يا يطلعوا للعدو

يا يقطعوا التواريخ .

اللوحة الخامسة :

و مادمتم بتحب البكا
على كتفى نام
و انا احكيك
عن الصبح
اللى راح و لا جاش
لما كنا فى سن بعض
و كنت بستناه
على سطوحنا
اللى مات بالقلب
هو ما كانش كبير
بس نافذ للسما
و ضحكته
تتكشف بها الغمات
كان ليلاى
يفك قلبى و يغسله
من بزايىز الندى
و يخش صدرى يطوقه

م الحزن و الدخان

و يعيد على عيوني

الباهتة بالالوان

كان يقوللى كلام

اذا قولته

اضب الجن و الشياطين

يحدفنى على ضهر السما

الم فى النجمات

كان يغنى

و انا اغنى

يا فجر يا مستنى

ورا العتبات

هات معاك ضحكة

نفرشها عالدمعات .

المشهد السادس الذكر

المنظر :

نا إسمى أحمد
و الشهرة عيسى
أطلع من الجامع
على الكنيسة
مدد يا عدرا
يا ستنا نفيسة
يا مصرنا الخضرا
مدد يا رئيسة

اللوحة الأولى :

قاعد على باب النبی
سیدنا علی بيفرق النفحة
قوم یا یتیم الوالدين
خد من دموعه حفان
و اذيله من علتك
ما ینوبه و زیادة
الولس غالب و الوبا سلسال
و هل یحل التیمم من تراب محتل
هو الشهيد أبو الشهيد , و أنت
وحم البتولة فی موسم الصبار
منك و فیک الوجع یا عزیز الدمع
سقطوا الحبالی فی الأشهر الحرمات
إن فات علیك ابن الحسین قوله
هتموت فطیس ولا شك
ما اوحلك
ما أوحى لك
إن الختان أولك و الشرنقة آخرك
فامسك فی دیل الأنبیا لتوه
قل هوو

بينك و بين المنتهى شبرين

قول هوو

دلوقت منك لوو

على اليمين سلم

على الشمال بص

إرمى بياضك ذكر

و إقعد بين إيديه

عيط !

اللوحة الثانية :

على باب سيدنا الحسين
ولد مدبوح و دمه فيه
نامت عينيه إنما الجرح حياني
فرق علينا الوجع و الذكر رحمة و نور
و اختصني بالسر قاللى أحمله لوحدى
لميت بواقى الروح و نقعتها فى مورد
مشيت أرش الأرض و أمس للمجاذيب
كبوا اليتامى فى حجرى ملو العين
و السابقين السابقين إتأوا فى جروحي
يا مين يلاحق على العارفين كرامات
إللى إبتلى بلبله بلل بلاه ريقى
أبريقى مسك النبى الهاشمى و تراويح
من ريح مخاض العدرا سرسب نور
أنا خدت من ربنا و هو أخذ منى
آمنى على كلمته سلمت له روحى
لبسنى تاج الملك و الأنبيا شاهدين

صفين ثلاثه أربعة

حوالين مقامى مربعة

من طرف طلعة رجب للنص من شعبان

طلعت من عب البخور راس النبی يحيى

راس الحسين ضبيتها فى عاشورة

أنا ليا صورة مع الثلاثه الراشدين

أما على صلى باليتيمة إمام

على قبة الصخرة طالنى حجر

وقعت فى عب المسيح و النار

سيدنا إبراهيم شالنى بأعجوبة

لفنى فى علم السما و طيران

ما دمتى بالأرض إتقفلتى عالخاطين

النبي فيكى إتتقط

طب

ساكت

مات .

اللوحة الثالثة :

حجر الرئيسة وسع و الديوان منقاد
ياكلوا الموالى المقطوعين و العيال تلعب
على الرخام المرمى و الكبليات النور
الدور عليك يا المبتلى قرب
خد من شفايفنا الندى اشرب
يجوز لك فطار رمضان
ما عليك من حرج
ولا عوض ولا كفارات ولا عسر
و على العموم السالكين أحوال
قعدت على السندسى
لابسة الحرير نبوى
الطرحه خمري و الخواتم عاج
يا مين يسابقنى على فرعها الكارم
صلت على جدها
بصت و شاورت لى
القولى لك يا بو العينين الرمدانين و حلال

حلالى فيك الطيبات و الذكر
اطلع على المحملى و اتغطى بالبردة
و شق راسك بسيف الحسين م النص
دم الحجامة نزل و المبالى أكوام
و الدودى من عيني الشمال يبص
بشويش عليا بقى يأم الحزام براق
دا أنا العزيز العزيز و الألفة عاليق
بس الوجيعة حنضلة بتكايد الغندور
التوبى رتق عالكثاف و الظهر
و القلب عالبدين العليل الثقيل
قالت سلامتك يا ولد عصران
يابو القيطان مغربى
و الهدوم كشمير
قد حكمت المحكمة و الحكم سلطانى
محكوم عليك بالرضا و العشق دراويشى
تطلع أوام من و تلف ما تجيشى

إلا ولا بس توب ما بيدوبشى
و هدية منك فيك حليبها ما يروبشى
و السبحة صابحة صابحة و دمها بيشر
قلت لها يا سيدة هلبس لك الخيشى
و إن كان على هديتى
هحلب دموع عينى
و صوابعى أهى كلها
فى حجرك بلح زغلول
دقوا الرقوق النحاس
و الحضرة قامت لى
و أنا باخد العهد فى مقام
ماما
الشريفة
العفيفة
المشيرة
الكريمة
ستنا السيدة زينب .

اللوحة الرابعة :

انا حنة نبى
عبدك الصالح
حين أما الأقى
السما فاتحة
أتصالح
مع الأنبيا و الحرس لابيض
و ألمانى من تحت عتباتك
حتت بنور
يلضمنى المنتهى سبحة
أول طلوعى سلمك سلمت
غسلت روحى و منافعها
ملست على الأوليا
ولى ولى
حسي على
فى الحضرة بقللوا الدروايش
مدد يا أمير الجيش
يا شبل الأسود نظرة

الجثة حاضرة
و الروح في مندليك
نادرها أجيلك أرتمي
بعتبتك الخضرة
شميت حشيش البخور
إتسطل قلبى
و بكيت فى كفين الخليفة
منحنى عهد التابعين
سمعت له ورد الشواذلية
فى ليلة النص من شعبان
خدنى على فرس النبى الخضرة
عدانى على السيدة نفيسة
على المتولى
على الطاهرة
حنانى من دم المطاهرة
فى ساحة البدوى

ثم إعتلابى
على مادنة الأزهر
قلعت و إتوضيت
من بزاييز الندى
و عرق النبى يوسف
نادانى هاتف
من حداك صنيت
إدلى بشهادتك للسما
أدليت
القمح السنادي شح
الحج السنة الجاية
فى تل أبيب
قبضوا على عمر
بيناصر الفقرا
ثم إرتميت على
صدر النبى يعقوب و بكيت

نشف دموعي الهلالية

بقميص ابنه

سلمت على الأنبياء و نزلت

أول نزولي زغرتوا

تفتت

كبروا هزيت

دماغى

هزة التنفيض

أنعم علينا بما أنعم عليك

رديت

كل الفرق فى النار

اللوحة الخامسة :

عارف

أنا ليه مآمن لك

علشان مش شايفك

بس حاسس بك

بتعيط فى القلب معايا

و بتكنس دمي المحروق

بتططب على روى لتطفش

بتطمنى .. أروق

عارف لو مانتاش جوايا

كانت سكنتنى العفارىت

و لبسنى الجن

و فتحتنى الشياطين

كنت مشيت على إيدى و رجلي

و شفت الويل

و شربت الذل

لكنك أمنتنى

و إستممنتنى

و هزمنأ أنا و إنت الكل

عارف

لما هقابلك

راح أقرب لك قوى

و اتحقق منك

أرتمی على صدرك

و أبكى .

الشاعر فى سطور



أحمد الصعيدى
شاعر و كاتب مسرحى
عضو اتحاد كتاب مصر
عضو مؤسس و رئيس نادى أدب قصر ثقافة شبين الكوم لدورتين متتاليتين
عضو الأمانة العامة لمؤتمر أدباء إقليم غرب و وسط الدلتا الثقافى
عضو لجان التحكيم و المشاهدة بالإدارة العامة للمسرح
عضو مؤسس للمنبر الثقافى بالمنوفية و مجلة بشاير الصادرة عنه
شارك فى العديد من المؤتمرات الأدبية و الفعاليات الثقافية و الفنية على المستوى القومى و العربى

المؤلفات

أولا الشعر

ديوان (الموت على الطريقة المصرية) 1994 طبعة خاصة
ديوان (جبال الكحل) الهيئة العامة لقصور الثقافة 2000
ديوان (سيف الجلالة) سلسلة أصوات وزارة الثقافة 2002
ديوان (حروف العلة) دار نشر أرابيسك 2009
ديوان (الشمس إالى باتت صاحبة فى التحرير) سلسلة إبداعات الثورة 2013

ثانيا المسرح

- مسرحية سقفة للنبي (إنتاج الهيئة العامة لقصور الثقافة)
مسرحية البركة (إنتاج الهيئة العامة لقصور الثقافة)
مسرحية الضهر الأحمر (إنتاج الهيئة العامة لقصور الثقافة)
مسرحية عودا (مهرجان نوادي المسرح)
مسرحية القضية 142 (مهرجان نوادي المسرح)
مسرحية العامرية 2 (مهرجان نوادي المسرح)
مسرحية النيل و الفرات (المهرجان العربي للمسرح) إخراج دكتور عمرو دواره
مسرحية السقط (جريدة مسرحنا)
مسرحية ذكريات فتحي زوزو (جريدة مسرحنا)
مسرحية دم الرياحين (جريدة مسرحنا)
مسرحية ليلة الكومبارس (جريدة مسرحنا)
مسرحية إالى ما يشتري يتفرج) كلية الآداب جامعة المنوفية
و جامعة العلوم والتكنولوجيا
أوبريت سبت الكرامة (الفرقة القومية للمسرح بالمنوفية)
أوبريت حماسة على المناديل (الفرقة القومية للمسرح بالمنوفية)

الجوائز

- جائزة النص المسرحي (المسابقة المركزية لقصور الثقافة 1997)
جائزة الأشعار (مهرجان نوادي المسرح 1998)
جائزة النص المسرحي (مهرجان نوادي المسرح 2004)
جائزة النص المسرحي (المهرجان العربي للمسرح 2005) عن مسرحية النيل و الفرات
جائزة القصيدة العامية (مؤتمر أدباء غرب الدلتا الثقافي 2007)
جائزة الأشعار (مهرجان القوميات الخامس و الثلاثون 2009)
التكريم
درع التكريم مهرجان نوادي المسرح 2014
درع الهيئة العامة للكتاب 2016
درع الهيئة العامة لقصور الثقافة 2016
شهادات التفوق و التقدير من كليات الآداب و التربية و الهندسة جامعة المنوفية و إقليم وسط
الصعيد الثقافي

محتوى الكتاب

2.....	بطاقة الكتاب
3.....	الإهداء
5.....	المشهد الأول " الوجع "
19.....	المشهد الثانى الشارع
33.....	المشهد الثالث الوطن
47.....	المشهد الرابع الذكريات
61.....	المشهد الخامس الغربية
73.....	المشهد السادس الذكر
87.....	الشاعر فى سطور
90.....	محتوى الكتاب